

# Ekyo Kiro Ahari Gologosa

Jeffersonville, Indiana, USA

Okwamwenda 25, 1960

1 Yebare, Ow'eishe-emwe Neville. [Ow'eishe-emwe Neville yaagarukamu ati, "Oheeble omugisha, ow'eishe-emwe!" -Omur.] Ruhanga akuhe omugisha, Ow'eishe-emwe Neville. Yebare, munonga munonga.

Muraire gye, banywani. N'eky'omugisha muhango kuba hanu omu kanisa omurundi ogundi, akasheeshe aka, kuheereza Mukama, omu buryo bw'okubuurira Ekigambo kandi n'okushabira abarwaire. Kandi ninsiima munonga ahabw'eri izooba.

Kandi naatangaara, ku naataahamu nti. Ow'eishe-emwe omwe yaija yaagira ati, "Tindikwenda kuba nk'omubembe otashemereire owaatambiirwe." N'Ow'eishe-emwe Wright. Nkamushabira, mbwenu Mukama amukiriize kimwe. Mbwenu yaija, naarira, okunkwata omu ngaro, n'okugira ngu-ngu naayenda kusiima Mukama ahabwa-ababw'okutambirwa. Naayenda kugaruka kandi akasiima. Endwara yoona ekizire. Ari-ari kurungi munonga hati. Nitusiima ahabw'obujurizi obwo.

2 Kandi Charlie, iwe n'Ow'eishe-emwe Jefferies, ku muraabe nimwenda, mwije hanu mushutame omuri ezi ntebe hanu. Kandi nimutangirirwa n'okukiraho, nikwo mutaguma mwemereire. Ow'eishe-emwe oriya kuri, n'Ow'eishe-emwe Woods, naimwe mwije hanu. Muri . . . Ngigi hanu emyanya mikye, ebiri hanu aha ntebe, nikwo mutaguma mwemereire. Niinyikiriza, emyanya ebiri eri hanu, kandi, eego, nimubaasa kutangirirwa munonga okwija mukashutama omuri egi myanya.

Tushemereirwe, naitwe. Niinyikiriza kikagambwa, rimwe ngu, "Nkasemererwa ku bangambiire . . ." Ruhangaakuhe omugisha, ow'eishe-emwe. [Ow'eishe-emwe yaagira ati, "Nitukunda kuba haihi n'omubuurizi." -Omur.] Yebare, yebare. "Nkasemererwa ku bangambiire ngu, tuyende omu nju ya Mukama." Ogwo nigwo mugisha gw'Omukristaayo n'okushemererwa, kugyenda omu nju ya Mukama.

3 Naaranzya oku n'oku, nkareeba banywani bangye baingi munonga barimu, akasheeshe aka, ninshemererwa munonga munonga ahabw'eki. Naashemererwa kureeba Ow'eishe-emwe n'Ow'eishe-emwekazi Dauch hanu, okuruga Ohio. Nindeeba Ow'eishe-emwe n'Ow'eishe-emwekazi Armstrong enyima kuri, kurugira kimwe okwo Ohio. Ruhanga abahe omugisha mwena, naimwe. Kandi, oo, okufa kuranza oku n'oku, nooreeba baingi munonga, kikaabaasa kuguma kugamba amaziina gaabo boona. Ow'eishe-emwekazi Hoover, twashemererwa kukureeba orimu, akasheeshe aka, okuruga eifo omuri Kentucky. Kandi na Charlie na Nellie, Ow'eishe-emwe Jefferies n'ab'eka ye, kandi ni baingi munonga abarimu, okuruga aheeru y'orurembo oru.

N'ahabw'ekyo twine ekihika kingi ky'okugiraho obwire burungi omuri Mukama, akasheeshe aka, nitwesiga Ruhanga kutubugana omu buryo bw'okuha emyoyo yaitu omugisha kandi n'okutuheereza ebintu ebi tukyenire.

Kandi naareeba hoonahoona omu mwanya ogu, ku naakutandika kweta banywani bangye boona abari hanu, nkaamara haihi akasheeshe konna, ningamba abantu abatari bamwe. Nikituma naayehurira kurungi kugaruka omu kanisa, kureeba abantu aba boona barimu, tukabugana.

4 Kirby kita ku turihika omu Iguru, reero Tukabuganirayo ahabw'obwire obwo bukuru bw'ebiro byona, okukwatanisa hamwe Okutarihwaho, twehinguririize Ekitebe ky'obukama kya Ruhanga, hamwe n'emigisha yonyini ei twena tushemereirwe? Itwe, Okwo, turyashushanisibwa Nawe, kandi tube omu nshusha Ye, n'omwoyo We ari ahariitwe, Okumuramya n'Okumuheereza Obutahwaho bwona, hatariho kuruha na kakye.

Teekateeka, tihariho kintu kyona eki orikubaasa kuteekateekaho, eki orikukunda kukora, ekitarikukurusya kukikora rimwe na rimwe. Charlie, ningira ngu nyowe naiwe tuhiigire hamwe kaamugye okukira ekindi kyona eki turikukunda kukora, omu muringo ogwo, kwonka, noomanya, nooruha waaba nookikora.

Kandi ni-ninkunda ku-kugyendesa ebigyere, kutemba enshozi reero nkaribata buzima. Kwonka ninduha, obumwe n'obumwe, nooyenda kugira ekindi eki waakora.

Kandi ninkunda kuvuga emotoka. Obumwe n'obumwe nimpurira naaba nk'owaaruha kandi noga, n'emitsi eshaasha. Reero ntemba omu motoka yangye ntsimbura, kandi mpamira ahari siteeringi, ninshuma omu ruguuto, niinyeshongora nti, "Nshemereirwe munonga kureeba nimbaasa kugira nti ndi omwe aharibo," nari ekindi. Nkwatsire munonga egoo siteeringi, niinyeshongora, kandi nindibatisa ekigyere kyangye ahansi n'amaani, ninteera akaari. Kwonka, mbwenu, ahanyima y'akaanya kakye, nduha, reero ngaruka omuka ntandika ekintu ekindi.

Kwonka ku turitandika kuramya Ruhanga omuri obwo Bugabe busya, tiharibaho kaanya na kamwe k'oburuhe, gu-guryaguma guri omugisha obwire bwona, obutaremuura. Kwonka, tihariho kubanganisa, obwo turyaba tuhindwirwe. Titurishusha nk'oku turikushusha hati. Turyaba tuhindukireho, ebihangirwe ebiine omutaano kukira oku turi obwire obu. N'ahabw'ekyo, tushemereirwe.

5 Naaba ninteekateeka. Tindikumanya yaaba eki ndakigambre nari ngaaha. Ow'eishe-emwe Charlie, obwire obuhingwire, nkaba ndi nawe eifo omuri Kentucky, reero yaagira ati, "Ow'eishe-emwe Branham, nooteekateeka, omu Kutegyeka kwa Kristo kw'emyaka Rukumi, nyowe naiwe turyahiiga kaamugye?"

Naagira nti, "Tindikuteekateeka ntyo, Charlie."

Yaagira ati, "Mbwenu, nitugikunda munonga," ati, "no-nooteekateeka ngu turyakora tutyo ku turihika omu Kutegeyeka kwa Kristo kw'emyaka Rukumi?"

Naamugira nti, "Ngaaha, tiharibaho kintu na kimwe ekyaitwa omu Kutegeyeka kwa Kristo kw'emyaka Rukumi."

Reero yaagira ati, "Mpaho, nitugikunda."

Naagira nti, "Charlie, ku naakubaasa kukwikiririsa ngu rimwe okaba ori empunu, bwanyima waatunguurwa waaba ekihangirwe ky'ekika ky'ahaiguru munonga, waaba omuntu? Okaayenda kugyenda, okaayetenga kugarukayo ngu oshemerererwe eby'okweshemeza by'empunu?"

Yaagarukamu ati, "Ngaaha."

Naagira nti, "Nooreeba, okaaba ori ahaiguru munonga kukira empunu, hati, ori omuntu, tokaayetenga kugaruka kuba empunu bundi." Naagira nti, "Hati ekyo kibazemu emirundi omutwaro, haza okwo nikwo oriba ku orihindurwa kuruga hanu kuza omuri ekyo eki orikwija kuba. Toryetenga kugaruka kuba omuntu.

Ekyo kihikire. Kiryaba ekintu ekihindukireho. Nshemereirwe munonga ahaw'okukiteekateekaho, nimmanya ngu eizooba rimwe turyatomba ahaiguru munonga.

6 Kare, hati, Mukama ku araabe naakunda, Sande erikwija, eraije kuba nka . . . Obwo ninza kugyenda, kuza okwo omuri Wyoming, n'omunywani omukundwa; nari kuriya omuri Idaho, na munywani wangye omukundwa, Ow'eishe-emwe Miner Arganbright, Ow'eishe-emwe Clayt Sonmore, aba Christian Business Men.

Saabiiiti erikwija, saabiiiti eraakurate erikwija, hati ni; ebiro 7, nshemereire kuba ndi omuri-omuri Dallas, Texas, omu Ruteerane rw'aba Voice of Healing. Kandi niinyija kubuurira ebiro 7 nyekiro. Reero ngarukye, kuza kuri omuri Idaho n'Ow'eishe-emwe Arganbright hamwe n'aba Christian Business Men. Kandi obundi ngireho ekiro kimwe ahari Minneapolis, tutakarugireyo. Reero bwanyima tugireho kyantsya emwe y'aba Christian Business Men.

Mukama ku araakunde, akasheeshe ka Sande erikwija niinyenda kugaruka hanu aha kanisa omurundi ogundi, kandi ekyo ku kiraabe nikiikirizibwa kandi kuri okukunda kwa Mukama. Niinyenda kugamba aha ishomo rya Akasooroora Omu Muyaga, Mukama ku araakunde.

7 Ribaire nk'erigumire aha mutima gwangye, saabiiiti yoona.

Kandi akasheeshe kari, kare munonga, nka shaaha ikumi z'ekiro, nkasisiimuka naatunga ekiteekateeko eki, "Ekyo kiro ahari Gologosa." Mbwenu niinyenda kugamba ahari ekyo, akasheeshe aka: Ekyo Kiro Ahari Gologosa.

Kandi hati ahaw'okushoma oku, ka tubikuure hati omuri Baiburi zaitu, omu Byahandiikirwe, omu Ngiri ya Matayo Orirkwera, omu shuura ya 27. Kandi twaza kutandikira aha mushororongo gwa 27 reero tushome ekicweka ky'Ekyahandiikirwe eki, kutunga omusingye gwaitu, reero tutandikireho. Kandi ahanyima ya saaviisi y'okubuurira, obwo nituza kugiraho okushabira abarwaire.

8 Kandi, oo, kwiha omurundi ogwahereerukire kuba hanu, niinyijuka, ninshushanisa obuheereza bwangye obusya. Ntungire obujurizi bwingi omu ruteerane orwo kukira obu naatungire omu ruteerane orundi rwona kumara obwire buraiingwa.

Hariho nk'ekintu, ngu nooteekwa kukoragana n'omuntu, n'obu ekirengire eby'obuhangwa kyakworekwa munonga kita. Kwonka, mwareeba, okutambirwa nikuteekwa kwegamira aha kwikiriza kw'omuntu okwe. Hati, omuntu ku araabe aine okwikiriza . . .

Kandi nibareeba, nka, Omwoyo Orirkwera naaza omu bateeraine agire ati, "Ebantu ebi n'ebi bikabaho. Kandi, ngu, eiziina ryawe ori nanka na nanka. Kandi ngu nooruga omu mwanya nanka. Kandi n'ekintu nanka eki waakozire. Kandi oku nikwo kirikuza kuba." Kandi oreebe byona byabaho bityo!

Kandi, ogwo muntu, oshutami aho, ashemereire kuranza akagira ati, "Ogwo naateekwa kuba Ruhanga. Naayakiira okutambirwa kwangye."

Kwonka, omu mwanya gw'ekyo, ogwo muntu naagira ati, "Ntaho engaro onshabire, reero ninza kukira."

9 Kwonka okwo nikwo twegyesiibwe hanu omuri Amerika, mbwenu, n'ahaw'ekyo, kwikiriza batyo. Kandi buzima ekyo n'eky'Ebyahandiikirwe.

Kwonka hati nitireeba, omuri Afrika n'omu myanya etari emwe, ekintu nk'ekyo ka kibeho, abateeraine boona nibaimuka rimwe, baakiira okutambirwa kwabo, ahaw'okuba tibeegeyesiibwe ekintu kyona. Mwareeba? Tibakeegyesiibwe nangwa n'okutambirwa. Reero ku barikureeba ekyo, bamanya ngu hariho Ruhanga ohuriire. "Kandi ku Araabe ahuriire, Niwe-Niwe orikukirayo obukuru, kandi Na-Naatamba." Kandi nikyo ekyo, ahaw'okuba omusingye niguba gwaherize kuteebwaho, emisingye, ngu n'Omutambi, kandi naatambira abantu.

Reero ku barikureeba Okubaho Kwe nikukorera omu Kanisa Ye, obwo bagira bati, "Ekyo nikimara. N'ekyo kyonka eki turikwetenga."

Kwonka twegyesiibwe, "kuta engaro aha barwaire," n'ebintu ebiri nk'ebyo. Egyo niyo nshonga erikutuma kitaakora kurungi munonga omuri Amerika.

Hati, mwijukye, Sande erikukurataho omu kasheeshe, Mukama ku araakunde, Ow'eishe-emwe Neville naija kuriranga, buzima. Kandi ni Akasooroora Omu Muyaga.

10 Hati, naaba nimbaaha akaire kakye k'okubiikuura omu Byahandiikirwe byanyu, omuri Matayo 27. Ka tutandikire a-aha mushororongo gwa 27 kushoma, gw'Engiri nk'oku yaahandiikirwe Matayo Orikwera. Hati ka tuhurikize tuteireho omutima okushoma oku.

Bwanyima abaserukare b'omutegyeki baatwara Yesu omu kibuga ekirikwetwa Puratorio, omutwe gwabo gwona baagumuteeraniraho.

Baamujuura ebijwaro bye, baamujweka omwenda gwa karari.

Ku baaherize kuruka ekirunga ky'amahwa, baakimujweka omu mutwe, baamukwatsa ekibingo omu mukono gwe . . . , baamutsimbira amaju, baamuteerera enaku nibagira bati: Singa, Mugabe w'Abayudaaya!

Baamucwera amacwante, baakwata ekyo kibingo, baakimuteera omu mutwe.

. . . ku baaherize kumuteerera enaku, baamujuura ogwo mwenda, baagaruka baamujweka ebijwaro bye, baamutwara kubambwa aha musharaba.

Ku baabaire nibashohora, baabugana omushaija wa Kureene orikwetwa Simooni; ogwo baamugyema kwekorera omusharaba gwa Yesu.

Ku baahikire, baahikire aharikwetwa Gologosa, amakuru gaakyo ngu Omwanya gw'empanga y'omuntu,

Baamuha viinyo ejwangiremu omubazi ogurikwetwa sumuruna; . . . ku yaagirorizeho, yaayanga kuginywa.

Ku baaherize kumubamba, baabagana ebijwaro bye, nibabiteerera enteenyu (Ekyo kikabaho ngu ebi nabi yaagambire bihikiirire ebi yaagizire ati: Baabagana eby'okujwara byangye, baateerera enteenyu ekijwaro kyangye. . . baashutama ahansi, baaguma nibamureeba.

Baahanika ebigambo ebi baamutabaariza . . . ahaiguru y'omutwe gwe, ebyabaire bihandiikirwe biti: OGU NI YESU, OMUGABE W'ABAYUDAAYA.

Kandi akabambwa hamwe n'abambuzi babiri, omwe aha rubaju rwe rwa buryo, n'ondi aha rwa bumosho.

Kandi n'aba-n'abaabaire nibahinguraho baamutsyorera, nibamuzongoreza emitwe,

Nibagira bati: Iwe orikusheenya hekalu, okagyombeka omu biro bishatu, yejune! Ku oraabe ori Omwana wa Ruhanga, hanuka orugye aha musharaba.

Abanyamurwa abakuru n'abahandiiki n'abakuru b'abantu nabo baamutsyorera batyo nibagira bati:

Akajuna abandi; tarikubaasa kwejuna. Ngu, N'omugabe w'Abaisraeli! Naahanukye, arugye aha musharaba hati, naitwe tumwikirize.

Ayesiga Ruhanga, mbwenu naamujune hati, ku araabe naamukunda; ahabw'okuba yaagira ati: Ndi Omwana wa Ruhanga.

Kandi n'abambuzi abaabaire babambirwe nawe nabo nikwo baamuteerera enaku baamuteerera enaku batyo.

Okuruga aha shaaha ya mukaaga okuhitsya aha ya mwenda omwirima gwashweka ensi yoona.

Ku bwabaire buri haihi kuhika aha shaaha ya mwenda, Yesu yaagamba n'eiraka rihango, ati: Eli, Eli, laama sabakasaani; amakuru ngu; Ruhanga wangye, Ruhanga wangye, n'enki ekyakuntsigisaho?

Bamwe aha baabaire beemereire aho, ku baakihuriire, baagira bati: Omushaija ogu naayeta Eliya.

Ahonaaho omwe . . . yairuka, yaakwata ekyangu, yaakijabika omuri viinyo erikushaarira, yaakita aha kibingo, yaamuheereza kunywa.

Abandi baagira bati: Reka tureebe Eliya ku araabe naija kumujuna.

Bwanyima Yesu yaagaruka yaagamba n'eiraka rihango, yaahayo amagara ge.

Omukingo gw'omuri hekalu gwataagukamu ebicweka bibiri okuruga aha mutwe gwagwo okuhika ahansi, ensi yaatengyeta, enkiri z'amabaare zaayatika,

. . . ebituuro byaiguka; emitumbi mingi y'abahikiriire abaabaire bagwejegyeire yaazoorwa;

Baaruga omu bituuro bwanyima y'okuzooka kwe, baataaha omu rurembo orurikwera, baareebwa baingi.

Omukuru w'abaserukare n'abu yaabaire aine nibarinda Yesu, ku baareebire omutsitsa n'ebindi byabaho, baatiina munonga, nibagira bat: Buzima kwo ogu abaire ari Omwana wa Ruhanga.

11 Reka twinikye emitwe yaitu akaire kakye tushabe.

Mukama, nitumanya ngu Niiwe Ruhanga. Kandi ni . . . Ahanyima y'okushoma Ekigambo eki ky'ekitiinisa kandi ekirikwera, na hati nitubaasa kureeba ngu emitwarize Yaawe tekahindukire. Otuura ori Ruhanga. Kandi kikaba nikireebeka orikushusha oti Yesu akaba atarikuza kutunga obuhwezi bwona, ngu Akakwatwa n'engaro z'ababi kandi yaatematemwamu ebicweka, yaacwerwaho amacwante, yaashekyerewa, kandi yaahanikwa aha musharaba, naajwa eshagama, naafa. Kandi kikareebeka orikushusha oti hakaba hatariho buhwezi bwona, ahantu hoona, okuhitsya obu nangwa Yaatakire, We wenka ati, "Ruhanga wangye, Ruhanga wangye, n'enki Ekyakuntsigisaho?"

Kwonka, Okora omu bwire obu haba hatariho kindi kyona ekirkubaasa kukora. Tuhairwe kumanya, Mukama, ngu ku turaabe twine emigyera yoona ei tutarikubaasa kwambuka, ku turaabe twine enshozi ezi tutarikubaasa kutemba, Ruhanga ashongokire omu kukora ebintu ebi abandi batarikubaasa kukora.

Oshongokire, aha murimo, ahakuba Okamanya enshonga y'ekiro ekyo ahari Gologosa. Iwe, ahabw'okuba Ruhanga, Ogwo otaine bugarukiro, okamanya ngu obwire obu nibuteekwa kwija. Kwonka ku kyahikiriire, obwo Okooreka ku Ori Ruhanga. Okooreka Ogwo owaabaire ari mukuru.

12 Okatengyetsa ensi, kandi abahikiriire abaabaire bagwejegyereire omu itaka bazooka. Okairaguza eizooba nyekiro, nk'omwirimma gwa nyekiro, orikworeka ngu Ori Ruhanga. Kwonka Okareebeka nk'ohunami omwanya muraingwa.

Reka, omuri eki, twihemu encwamu egi, ngu, kasita tuba nitugyendera omu Mwoyo, nitwebemberwa omukono gwa Ruhanga, n'obu haakubaho ekyareebeka nk'ekishobire, kwonka nabwo tworekyereire Gologosa; Ruhanga naija kugamba omu shaaha yonyini, omu bwire bwonyini.

Hati, Tata Ruhanga, nitushaba okusaasirwa ebibi byaitu n'eb'yokushiisha byaitu. Nitushaba Omwoyo Waawe okutwebembera. Twebembere, nk'oku enkombe yaayembeire omwana gw'entaama. Ka tworobere kyona ekirkubaasa kutuhikaho, nitumanya eki, ngu Ruhanga akora ebintu byona kurungi, kandi tumanye ngu nibiza kuba gye.

Ba naitwe eriizooba omuri egi saaviisi. Nitushaba ngu ojune abo abari omu mbeera y'okujunwa, kandi abarikusherura okujunwa. Ijuza abo n'Amagara Agatahwaho, abariyo nibasherura. Nitushaba ngu Okize abo abarwaire n'abaine obusaasi, abaija, nibasherura okutambirwa. Kandi nitwija Kukuhimbisa ahabwakyo. Twabishaba omu Iziina ry'Omwana Waawe, Omujuni waitu, Yesu Kristo. Amiina.

13 Hati, omu kugamba akasheeshe aka, nitwenda kubajutsya eishomo eri ntooraine kugambaho eririkugira riti: Ekyo Kiro Ahari Gologosa.

Nirireebeka orikushusha oti ryaza kbuurirwa kakye aheeru y'obunaku obu rishemereire; eri rishemereire kbuurirwa aha Rwakataano Orurikwera. Gologosa eshemereire kwijukwa buriizooba. Kandi tuhuriire bingi munonga ebirkugikwataho, twashoma bingi munonga ebirkugikwataho. Ababuurizi bagibuuriireho, kwiha obwire nibutandika kubaho. Abeeshongozi bagyeshongoire, omu busingye bwona. Baanabi bakagiraguraho, emyaka enkumi ina etakabaireho. Kandi na baanabi b'ebiro ebi nibatworeka okwo enyima obu yaabaho. Ka n'ekiro kikuru munonga! Ni kimwe aha biro bikuru ebirkukirayo aha biro byona ebi Ruhanga yaikiriize kubaho omu nsi.

Kandi ku eraabe eri nkuru munonga aha ruganda rw'abantu, Gologosa, nintekateeka ngu ni kirungi ahariitwe kugaruka enyima tukagishwijuma, tukareeba eki erikumanyisa ahariitwe. Ahakuba, nimpamya, omu shaaha egi eya bwanyima ei tutwiremu, nitusherura buri buku bwona bwa Ruhanga obu turikubaasa kumanya. Kandi bwona obu turikubaasa kubona, turi hanu kubwegaho, kureeba obwaitu nibuuha, kandi n'ebi Ruhanga atukoreire, kandi tureebe n'ebi Araganiise kutukorera. Kandi ekyo nikyo kitureeta aha kanisa.

14 Egyo niyo nshonga etuma omubuurizi yaaburiira, egyo niyo nshonga etuma yaashoma kandi akeecumiitiriza omu Byahandiikirwe, kandi akasherura okwebemberwa kw'Omwoyo, n'ahabw'okuba n'omuheereza w'abantu ba Ruhanga. Kandi naagyezaho kusherura ekintu ekiraije . . . eki Ruhanga arikwenda kugambira abantu Be, ekintu ekyakubaasa kubahwera. Obundi, nikibaasa kuba, kubashinja omu bibi byabo, kwonka kikabahwera okubaimutsya, kugira ngu babaase kureka ebibi byabo reero baimukye baheereze Mukama. Kandi abaheereza bashemereire kusherura ebintu ebi.

15 Kandi eki, ahabw'okuba eky'omugasho munonga, kimwe aha biro ebirkukirayo obukuru, ka tureebe ebintu bishatu ebitarikushushana ebi ekyo kiro kyamanyiise ahariitwe. Tukaabaasize kukwata amagana n'amagana. Kwonka, akasheeshe aka, naatooranamu ebintu bishatu ebitarikushushana, by'omugasho gw'amaani

ebi turikwenda kureeba, ahaw'omwanya mukye ogwaza kukurataho, eki Gologosa yaamanyiise ahariitwe. Kandi ninshaba ngu kisingise orubanja buri musiisi ori hanu; kireetere orikwera weena kuza aha amaju; kireetere buri murwaire kwimutsya okwikiriza kwe ahari Ruhanga, reero agyende, akizire; buri musiisi, ajunwe; buri muntu ogarukire enyima agarukye, kandi akwatwe enshoni; n'orikwera weena, ashemererwe, atungye amaani masya n'amatsiko masya.

16 Ekintu kimwe kikuru, eky'omugasho eki Gologosa erikumanyisa ahariitwe hamwe n'aha nsi, ni, ekamaraho ekibuzo ky'ekibi, kyarimwe. Omuntu akaba asingirwe orubanja rw'ekibi. Kandi ekibi kikaba kiri ekiheneso eki omuntu weena yaabaire atarikubaasa kushashurira. Ekiheneso kikaba kiri eky'amaani munonga okuhitsya obu haabaire hatariho muntu weena owaakubaasize kushashurira ekiheneso ekyo. Buzima niinyikiririza kimwe ngu Ruhanga akaikiriza ngu kibe kityo, ngu ekiheneso kibaase kuba eky'amaani munonga kugira ngu hatabaho omuntu weena owaabaasa kukishashurira, nikwo Abaase kukikora We wenka. Hati, ekiheneso ky'ekibi kikaba kiri okufa. Kandi omu kibi twena nimwo twazaariirwe, twahangirwa omu kutahikiirira, twaija omu nsi, nitugamba ebishuba. N'ahaw'ekyo hakaba hatariho n'omwe ahariitwe owaabaire ashemereire, nari, bakaba batarikubaasa kubona omuntu weena omu nsi owaabaire ashemereire.

17 Kandi ekibi tikiratandikiire omu nsi. Ekihi kikatandikira omu Iguru. Lusafeeri aka . . . Lusafeeri, Sitaane, akaba ari ekihangirwe ekyakyenirwe, ahaw'obugomi bwe, atakabaire n'okwija omu nsi. Ekihi kikatandikira omu Iguru, ahu Ruhanga yaateire Baamaraika, n'ebindi, aha musinge gumwe ogu Yaateireho abantu; okumanya, omuti gw'okumanya, omuti gw'Amagara n'omuti gw'okumanya, ahu omuntu yaabaire naabaasa kwetooraniram. Kandi Lusafeeri ku yaahairwe obushoboorozi bw'okubanza, kutoorana, akenda ekintu kirungi ekirkukira ahari ekyo eki Ruhanga yaabaire aine. Ekyo kikatandikaho omurabanamu.

18 Kandi hakaba hariho ekirkuragiirwa ahaw'ekibi. EKirkuragiirwa kikaba kiri okufa. Okufa nikyo kyabaire kiri ekiheneso. Kandi, ekyo n'okugira ngu, eki nitubaasa kukitaahamu tukishoboorore munonga, ahaw'okuba niinyikiriza ngu hariho okufa kumwe. Hariho Amagara gamwe. Niinyikiriza ngu omuntu oine Amagara Agatahwaho takaabaasa kufa na kakye. Niinyikiriza ngu hariho okucwekyererezibwa kimwe kw'ogwo mwoyo ogukora ekibi, ahakuba Baiburi neegira eti, "Omwoyo ogukora ekibi, buzima guryafa." Ti muntu; "omwoyo ogukora ekibi." N'ahaw'ekyo, Sitaane buzima naateekwa kufa, acwekyerezibwe ahwereho kimwe. Ka nimpakanisa abantu b'enyikiriza erikugira ngu abantu boona baryajunwa abarkugira ngu Sitaane aryajunwa! Akashiisha, kandi niwe bukomooko bw'ekibi. Kandi omwoyo gwe gukashiisha; kandi akaba ari omwoyo. Ogwo mwoyo guryahweraho kimwe, tihariho akantu kaagwo konna akaritsigaraho.

19 Kandi ekibi ku kyahikire omu nsi, enyima omu kutandika, nk'esuuka erikwiragura neeshuma kuruga omu iguru, buzima kikashanyaraza ensi. Kikata buri kihangirwe, omu nsi, n'ebihangirwe byona bya Ruhanga, omu buhuuku. Omuntu akaba omuhuuku w'okufa, oburware, emirabanamu, enaku. Eby'obuhangwa byona bikagwa nakyo. Ekihi kikaba kiri omubazi gw'okushanyaraza buzima ogwashanyareize ensi. Reero twateebwa hanu, tutaine matsiko, 'habw'okuba buri kihangirwe aha nsi kikaba nikikyorobera. Kandi na buri omwe owaazairwe omu nsi akaba naakyorobera.

N'ahaw'ekyo, kikeetaagisa kwija kuruga omu Mwanya ogwabaire gutarimu kibi. Kikaba kitarikubaasa kuruga omu nsi. Omuntu omwe omuriitwe akaba atarikubaasa kucungura ondi. Kikaba nikiteekwa kuruga aha Ndijio.

N'ahaw'ekyo, omuntu ku yaamanyire ngu akaba ataanisiibwe na Ruhanga we, yaahinduka omuzengyerezi. Bakarira. Baataka. Baafa kubi. Baazengyerera, nibaraba omu nshozi n'omu mahamba, nibasherura Orurembo oru Ruhanga yaagyezire kandi akarwombeka. Ahakuba, akamanya ngu ku yaakugaruka omu Kubaho kwa Ruhanga, akaabaasa kubigambaho Nawe. Kwonka hakaba hatariho oburyo bwona bw'okugarukayo. Akaba abuzire. Akaba atarikumanya omuhanda ogu araatoore, n'ahaw'ekyo akafa kugyenda, naazengyerera, naagyezaho kusherura ahantu ahu yaakubaasa kubona omuhanda gw'okugaruka omuri ogwo Mwanya. Ekintu omunda ye kikamugambira ngu akaruga o-omu Mwanya ogwabaire guhikiriire.

20 Tihariho omuntu n'omwe hanu omuri aba bantu abarkureebwa abateeraniire aha, akasheeshe aka, nari omu bahurikiize orutambi rw'amaraka, ahi rurikuhika hoona omu nsi, tihariho n'omwe hanu, nari ahandi hoona, otarikusherura okwo kuhikiirira.

Nooshashura amabanja gaawe, oteekateeka oti, "Ekyo nikimara." Waahenza kushashura amabanja gaawe, bwanyima habeho owaarwara omu b'eka yaawe. Oburware ku burukukira, oshanga oine agandi mabanja g'okushashura. Eky'okubanza noomanya, eishokyre ryawe ritandika kuba enju, reero oyenda ngu ogarukye obe muto. Kandi hariho ekintu obwire bwona, obutoosha, kandi ahaw'ekyo kingonzi ky'ekibi. Kwonka omu mutima gwawe, ahaw'okushangwa ngu noosherura ekyo, nikyoreka ngu hariho Okuhikiirira ahantu nanka. Ahantu nanka, hariho ekintu.

21 Egyo niyo nshonga, emirundi mingi, ebiro ebi, ahaw'enki omusiisi na hati naakizengyelerera. Omwishiki muto, murungi naasharaho obutsibo bw'eishokyre rye, kugira ngu akundwe baingi; ayesiigye erangi aha maisho, kugira ngu abonere; ajware ebijwaro ebirikworeka enshusha y'omubiri gwe. Ahabw'okuba, nikyo kintu kyonka eki arikubaasa kubona, kusherura ahantu kugyezaho kutunga ekintu ky'okumugarukira, ku yaakubaasa kureetera abashaija kumuteerera ekicurizo, bakamuhuubira omukono, bakamushendashenda. Abatsigazi nibakora ekintu nikyo kimwe aha mpangare, kugyezaho kwehindura omuntu orikusoonasoona egyo mpangare. Abataahi

nibombeka enju, bagyombekye omu bundi buryo, ahabw'okuba neeza kubonera kakyeho okukira eya mutaahi we. Kiriho obwire bwona, nitusherura ekintu, kwonka ekintu ekyo kigumizamu kwirira ahaiguru kakyeho.

22 Omukazi muto naaza kushanga ngu omukazi muto ondi naakundwa okumukira. Omutaahi naareeba enju erikureebeka gye munonga okukira eye. Omukazi naareeba ondiijo mukazi ajwaire omu muringo ogundi, naareebeka gye munonga okumukira.

N'ekintu ekiri omuriitwe, ekirkusherura ekindi kintu, kandi nikyoreka ngu tubuzire. Nitwenda kutunga ekyo kintu ekiraije kutugarura ahari okwo kumarwa, ekiraije kwijuza ogwo mwanya gw'enjara omunda omwo, kwonka nikireebeka orikushusha oti titurikubaasa kukibona. Abantu bakakigyezaho omu busingye bwona. Bakakiririra. Baataka. Baakora buri kintu eki baabaire nibamanya kukora, kwonka nabwo tibarakiboine, nibazengyerera omu nsi.

23 Aha muheru, ekiro kimwe, ekyo n'ekyo kiro ahari Gologosa, hakabaho Ogwo owaashuumire kuruga omu Kitiinisa. Ogwo, orikwetwa Yesu Kristo, Omwana wa Ruhanga, Owaarugire omu Kitiinisa, reero Gologosa yaateebwaho. Ekyo nikyo kiro obu omuhendo gwashashurwa, kandi n'ekibuuzo ky'ekibi kyahwa ebiro byona. Kandi kyaiguraho omuhanda gw'eki kintu eki turikugirira enjara n'eiriho. Kikataho omwanya gw'okumarwa. Tihariho muntu n'omwe orataayaayire Gologosa, kandi akareeba oku kyabaire, orikubaasa kuguma nk'oku yaabaire ari. Buri kintu eki areetengire nari akagirira orushusho, nikiboneka, ku arikuhika omuri ogwo mwanya.

Kikaba kiri ekiro kikuru munonga, kandi ekintu kikuru munonga, okuhitsya obu kyatengyeitse ensi. Kikatengyetsa ensi, nk'oku yaabaire etakatengyetsibwagaho. Yesu ku yaafeereire Gologosa kandi akashashurira ekibuuzo ky'ekibi,

24 egi nsi y'ekibi ekashwekwa omwirima. Eizooba rikaraara omu ihangwe, ryahwa amaani. Enkiri zaatengyeta, enshozi zaayatagurika, n'emitungi y'abaafiire yaazooka kuruga omu bituuro.

Kikakora ki? Ruhanga akakigyenderera, ahari Gologosa. Akahutaaza egzo nyamaishwa, erikwetwa Sitaane, ebiro byona. Hati akakara munonga okwiha obwo, ahabw'okuba kikareeta Omushana omu ruganda rw'abantu. Kandi omuntu weena naamanya ngu enyamaishwa ehutaaziibwe niyo ekazire munonga okukirayo, erikwekurua aho n'omugongo gwayo guhendekire. Hati, Sitaane akateerwa yaagwa ahansi, ahari Gologosa. Ensi ekakihamya ngu okwo nikwo kyabaire.

Omuhendo gw'ahaiguru ogurikukirayo ogurashashwirwe, kandi Ogwo wenka owaabaire naabaasa kugushashura, akaja yaakikora ahari Gologosa. Aho niho omuhendo gw'amaani gwashashuriirwe. Ekyo ni kimwe aba bintu ebyo.

25 Ruhanga akaba naakyenda. Tihariho muntu owaabaire ashemereire. Tihariho muntu owaabaire naabaasa. Tihariho muntu owaakubaasize kukikora. Reero Ruhanga yaija, We wenka, yaaba omuntu, yaatuura amagara g'abantu, aine ebyetengo by'abantu, kandi yaabambwa ahari Gologosa. Kandi aho ku . . . Sitaane akateekateeka ngu akaba atarikubaasa kukikora, ngu Akaba atarikubaasa kukirabamu. Akasingura omuri Gesesemaani kandi na buri kigyezo eki omuntu weena arabugaine. Akakirabamu nk'abantu boona, kwonka Yaashashura omuhendo.

Kandi ekyo nikyo kyareeteire ensi kushwekwa omwirima. Kikaba kiri nk'omubazi ogurikugwejegyeza, ahabw'okuschemeza. Dokita ku aha omuntu omubazi gw'okumugwejegyeza, naabanza yaamukabis, atakamushemeize. Kandi Ruhanga ku ya-yaashemeize Ekanisa, ensi ekaheebwa omubazi ogurikugwejegyeza, eby'obuhangwa byatengyetsibwa munonga. Tiky'okutangaaza! Ruhanga, omu mubiri gw'obuntu, akaba naafa. Bukaba buri obwire obu ensi yaabaire etwire etegyereize, kwonka baangi omuribo tibarakimanyire.

Nk'oku kiri n'eriizooba, baangi basherwire ebintu ebi, kwonka kandi tibarikubyetegyereza. Tibarikumanya ah'okuhungira. Na hati nibakigyezaho kusherura eby'okweshemeza n'ebintu by'ensi, nibagyezaho kusherura obuhungiro.

26 Hakaba hariho, haabaireho ebyapa bingi by'endagiiriro ebirikworeka ekyo kiro, ebirikushushanisa bikuru bingi. Kikaba kyorekirwe omu mwana gw'entama, omu nimi, omu kaiba, kandi n'ebintu ebi byona, kwonka nabwo tibirabaasize kukiihaho. Tibirabaasize kucwa ekyo kigo kya rufu, ahu Sitaane yaabaire naategyeka ensi.

Ezo nkiri zonyini ezi yaabaire atamburiraho, naashuma naanyegyera omu nsi, nizaaka n'obuganga bw'ekibiriiti! Lusafeeri akaba ari omwana w'obusheeshe, kandi akatambura omu nsi obu yaabaire erikwotsya n'omuriro ogurikubaruka niguruga okuzimu omu itaka. Ezo nkiri ezaabaire zihozire, Yesu ku yaafiire ahari Gologosa, zikajumbukayo zaaruga omu itaka.

Omuhendo ogwashashwirwe, kandi n'obuhuuku bwa Sitaane bukahendeka.

27 Ruhanga akagarura omu ngaro z'omuntu, omuhanda gw'okugaruka aha ki yaabaire naasherura. Akaba atakiine kurira bundi. Akateera, ku Yaahenzire oruti rw'omugongo rwa Sitaane, aho ahari Gologosa, oruti rw'omugongo rw'ekibi, n'orw'endwara! N'ahabw'ekyo nikireetera buri muntu ofa, aha nsi, kugaruka omu Kubaho kwa Ruhanga, asaasiirwe ebibi. Haleluya! Ebibi byaitu bisaasiirwe. Sitaane tarikubaasa kugaruka kututa omu mwirima akatwiha ahari Ruhanga.

Hariho omuhanda rugyendwa ogutairweho. Hariho n'esimu aho. Hariho esimu erikuhika omu Kitiinisa, kireetera buri muntu kuba haihi n'esimu egyo. Omuntu ku araabe aijwire ekibi, neemuhikanisa n'ahakuru. Naabaasa kusaasirwa ekyo kibi. T'ekyo kyonka, kureka ekibi ekyo kikashashurirwa. Oo! Tikirikukwetaagisa kugira oti, "Tinshemereire." Buzima, toshemereire, okaba otarikubaasa kuba oshemereire na kakye. Kwonka Ogwo oshemereire akaza omu mwanya gwawe. Orekwirwe. Tikirikukwetaagisa kuzengyerera bundi. Tikirikukwetaagisa kuba omuntu orikusherura eby'okweshemeza hanu omu nsi.

Ahakuba hariho enhuro ejiwire Eshagama,  
 Erikuruga omu mitsi ya Emanueli,  
 Abasiisi ku beejabika omuri ogwo mwegyemure,  
 Baihwaho ebibi byabo byona.

Toshemereire kubura. Hariho omuhanda rugyendwa, kandi n'Omuhanda, kandi nigwetwa Omuhanda ogurikwera. Otashemeire tarikugurabamu. Ahakuba, naaraba omu nshuro, okubanza, reero ataaha omu muhanda rugyendwa.

28 Akahenda amaani ga Sitaane. Yaigura enyigi z'ekihome ky'okuzimu, ahari buri muntu owaabaire akomeirwemu, omu nsi egi, omu bihome, naatiina ngu ku arifa, oku rufu eriba ahariwe. Ahari Gologosa, Akaigura ezo nyigi z'ekihome, yaarekura buri mbohe yaagyenda n'obusingye. Toshemereire kugaruka kubandikwa ekibi. Toshemereire kugaruka kuhayo engingo zaawe kushiisha, kunywa amaarwa, kureetsa, kuteera zaara, kugamba ebishuba. Noobaasa kuba ow'amazima, ohikiriire, kandi ogororokire. Kandi Sitaane tihaine eki yaakukikorera, ahabw'okuba okwatsire omurunga, omurunga gw'Amagara oguhamiire omuri Rukiri owa Iranaira. Tihariho ekintu kyona ekirikubaasa kukutengyetsa Kikagakwihihaho. Tihariho miyaga yoona erikubaasa kukutengyetsa Ekagakwihihaho. Tihariho ekintu kyona, nangwa n'obu yaakuba rufu yo yonka, terikubaasa kututaanisa n'okukunda kwa Ruhanga okuri omuri Kristo Yesu.

29 Ekyo nikyo Gologosa yaabaire neemanyisa.

Abantu abaabaire bari omu buhuuku bakarekurwa. Abantu abaabaire nibatiina okufa tibarikubaasa kugaruka kutiina okufa. Omuntu oiniire orushusho Orurembo, oru Ruhanga yaagyezire kandi akarwombeka, naabaasa kuteera entambo aze omu muhanda rugyendwa, kandi amaisho ge agahangye Eiguru, ahabw'okuba arekwirwe. Haleluya! Acungwirwe. Tarikwetenga kugaruka kuzengyerera, ahakuba hariho oburyo bw'okumanya yaaba ohikire nari otahikire. Ruhanga naatuha Amagara. Ebibi byaitu tibyakiriho. Ekyo kiro ahari Gologosa kikashashura omuhendo. Ku turikureeba ebyo byona, tiku'okutangaaza omuhimbi akahandiika ati:

Rwagati y'enkiri z'amabaare ezirkwatika n'omwirima ogushwekeire ensi  
 Omujuni wanye akainika omutwe Gwe yaafa.  
 Okutaaguka kw'omukingo kukashuuura Omuhanda  
 Ogurikuza omu kushemererwa kw'Eiguru na nyomushana etahwaho.

30 Abrahamu tikirikumwetaagisa kugaruka kuzengyerera, omu nsi yoona, naasherura orurembo. Omusiisi tashemereire kugaruka kwebuuza, yaaba naabaasa kujunwa nari ngaaha. Omurwaire tashemereire kwebuuza yaaba naabaasa kukira nari ngaaha. Okutaaguka kw'omukingo, ahari ekyo kiro ahari Gologosa, kukashuuura Omuhanda oguruhitsya aha businguzi bwonyini. Ruhanga akatuha amaani g'Omwoyo We, okutuura twine obusinguzi ahaiguru y'ebi byona; naatushaba okukiikiriza kwonka. Ekyo kikabaho ahari ekyo kiro ahari Gologosa. Tihakabahoga ekiro ekiri nkakyo. Tiharibaho na kimwe ekiri nkakyo. Tikikyetengwa ogundi murundi. Omuhendo gushashwirwe, kandi tucungwirwe. Ruhanga asiimwe! Tucungwirwe. Tihariho ekindi eki oshemereire kwebuuza. Tihariho kugaruka kukiteeberezaho. Byona bihirweho. Omukingo gukagarura enyima orutimbe, kandi turi omu muhanda rugyendwa, okutagaruka kuzengyerera bundi, kureka okwikiriza tukagumirizamu kimwe. Nitugyendera kimwe omu Kubaho kwa Ruhanga kwonyini.

31 Abrahamu akamanya, n'abandi bakamanya, ngu obu baabaire nibasherura Orurembo. Bakaba nibamanya ngubaarugire Ahandi hantu. Haine ekyabaireho. Bakaba batwire omu nsi eshanyareire. Emitsitsa ekaija. Eihunga ryateera. Engamba n'okwita kwingi! Omushega n'omwana gw'entama nibiryana, nimmanyisa omushega nigurya omwana gw'entama, n'entare erya ente. Tikirikureebeka gye. Hariho ekishobire. Akamanya ngu hariho ekyabaire kishobire. Abantu na mwene ishe naita mwene ishe; ishe aita omutabani, n'omutabani aita ishe. Hariho ekishobire. Ariyo naaba omugurusi. Ariyo naafa. Ariyo naahwa amaani. Endwara zimuriho. Ari omu buhuuku. Emiti neekura, kwonka teekaagumaho ebiro byona. Neefa. Enshozi zihinduka. Enyanja zooma. Amaizi gahwaho. Hariho ekishobire. N'ahabw'ekyo yaasherura omwanya, Orurembo ei ebyo byabaire bitaba na kakye. Akamanya, ngu ku yaakubaasa kugaruka omu Kubaho kw'Ogwo owaabaire naabaasa kubigorora, ebyo akaabaasa kubigaaniraho Nawe.

32 Oo, ka n'omugisha, musiisi 'we, nigwo, akasheeshe aka, kumanya ngu hati otungire ogwo Muhanda. Ekyo kiro ahari Gologosa kikaiguraho ogwo muhanda. Ahakuba ebyo byona ebi baatatenkuriitwe abo boona baabaire

nibaronda munonga kandi bakasherura, Gologosa ekabikuha, ahabwa busha. Okaabaasa ota kukyanga? Okaabaasa ota kukyanga, reero okaba memba w'ekigombe ky'ediini? Okaabaasa ota kukyanga, haza okatwara ekindi omu mwanya gwakyo, eby'okwesheemeza by'ensi? Ahabw'enki otarikukyakiira? Okutaaguka kw'omukingo nikugarurira kimwe omuntu omu Kubaho kwa Ruhanga, ataine kibi kyona, ky'omuringo gwona. Kandi nikutaho omuhanda omu maisho ge, ogurikumuhitsya aha kintu eki arikusherura: Eiguru, ekitiinisa, obusingye, Amagara Agatahwaho, buri kintu omu maisho ge honyini.

33 Ekyo kiro kikaba e-ntomi eyaitsire amaani ga Sitaane. Kikamara byona.

Kandi nimbaasa Kumureeba aho; Akaba ari Omwana gw'entaama wa Edeni, kurugira kimwe omu kicuuucu ky'okubanza ekyakirugiremu.

Abeeli, ahabw'okwikiriza, ku yaahaireyo ekitambo ekirikusiimwa ahari Ruhanga okukira ekya Kaini. Naateekwa kuba yaakomire omuzaabibu omu bitsya by'omwana gw'entaama, akagukurura akaguhitsya aha rukiri. Yaakwata ei-eibaare omu ngaro ze, nk'omusyo, yaagarura omutwe gwagwo enyima, reero yaagutematemwa kandi yaagutaagataagura okuhitsya obu gwafiire. Kandi ebyoya byagwo byaijura eshagama yaagwo. Gwayekuringa omu shagama yaagwo. Kikaba kiri ekicuuucu.

Kwonka aha kiro ekyo ahari Gologosa, hakaba hatariho omwana gw'entaama gw'ensi egi, kureka akaba ari Omwana gw'Entaama wa Ruhnga, owaabaire naafa, Naayekuringa omu Shagama Ye. Akatemwatemwa munonga, yaatemwatemwa, yaateerwa, yaacwerwa amacwante, yaateerwa ahansi, yaateerwa empi z'amaani, na buri kimwe, n'abantu b'ensi, n'Eshagama neetoonya neeruga omu butsibo bw'eishokye Rye.

34 Omwana gw'entaama gwa Abeeli ku gwafiire, gukafa, nigugamba omu rurimi oru Abeeli yaabaire atarikwetegyereza. Gukaba nigtaka.

Kandi Omwana gw'Entaama wa Ruhanga ku yaafire ekyo kiro ahari Gologosa, Akagamba omu rurimi oru hatarabaireho omuntu weena Owaamwetegyereize. "Ruhanga Wangye, Ruhanga Wangye, n'enki Ekyakuntsigisaho?" Akaba ari Omwana gw'Entaama wa Ruhanga, atematemirwemu ebicweka, atematemirwe.

Akaba ari Omwana gw'Entaama wenyini ou Abeeli yaabaire aine omu biteekateeko, obu areeba Oruzaaro rw'omukazi orwaraganisiibwe. Akaba ari Omwana gw'Entaama ou Danieli yaareebire, owaatimbiire omu rushozi, atahigwirwe mutnu. Akaba ari Enziga omu ndijio nziga, ahari nabi. Byona ebi baaragwire bikahikiirira ahari ekyo kiro, ekyo kiro ahari Gologosa. Ekyo kikataasyamu ekyo kintu kikuru. Ekyo kikahenda omugongo gwa Sitaane.

35 Eky'okubanza, tushemereire kusherura tumanye amakuru g'ekyo kiro. Eky kabiri, tushemereire kureeba eki ekyo kiro kyatukoreire, hati, eki kyatukoreire. Hati, eky kashatu, tureebe eki tushemereire kukorera ekyo kiro. Tushemereire kukora ki?

Eky'okubanza, tushemereire kukishwijuma, ahakuba n'ekiro kikuru, kikuru munonga okukira ebindi biro byona. Omuhendo gw'ekibi gukashashurwa. Amaani ga Sitaane gakahendwa.

Kandi hati nitwenda kureeba eki tushemereire kukora omu buryo bw'okusiima, hati, omu buryo bw'okusiima. Yesu ku yaafire aha Musharaba, ahari Gologosa ekiro ekyo, Tarashashwire muhendo gw'ebibi byaitu kwonka, kureka Akashashura n'omuhendo kandi yaataho omuhanda kugira ngu tubaase Kumukuratira; ahakuba itwe, nka ba Adamu abaagwire kwonka abaherize kucungurwa. Nk'oku Omwoyo yaayebembeire Adamu (Adamu w'okubanza) ahabw'Omwoyo, owaabaire naategyeka eby'obuhangwa byona, n'ahabw'ekyo itwe (Adamu wa kabiri), nari abantu b'ensi Kristo akatucungura, okwiha aha kiro kya Gologosa, nitubaasa Kumukuratira.

36 Hati, ku Yaafire ahari Gologosa, Akataho omuhanda. Akahayo Omwoyo, Omwoyo Orikwera, ou Yaayohereize akagaruka omu nsi, ahabwangye naiwe ngu atubaiseho. Ekyo nikyo Gologosa erikumanyisa ahariitwe, Okumukuratira.

Eky'okubanza, tukishwijume, tureebe eki kyatukoreire. Mbwenu hati nituteekwa kukora ki ahabw'ekyo kiro? Nyowe naiwe nituteekwa kukora ki?

Hati, nitugira tuti, "Mbweni, ekyo ni-ninkisiima. Ekyo ni kirungi munonga." Kwonka nituteekwa kukyakiira. Kandi okukyakiira, n'okwakiira Obuntu Bwe, Kristo omu mitima yaitu.

Obwo, nituba twarekurwa kuruga omu kibi, n'ahabw'ekyo tihariho njegyere z'ekibi ezirkutureereetaho, na kakye. Ruhanga, orikushusha oti titukakoraga kibi, ekyo Kitambo ekihikiriire kikatuhindura abahikiriire. Ahakuba, Yesu akagira ati, "N'ahabw'ekyo mube abahikiriire, nka Shoimwe ori omu Iguru oku ahikiriire." N'ahabw'ekyo, tihakiriho kindi kyona ky'okukora, kwonka nituhikiirizibwa Omu maisho ga Ruhanga.

37 Hati, aho niho tufeererwa omwanya gwaitu. Ku turaabe tuteerinzie, nitugyezaho kuranzya enyima oku twabaire turi. Kandi ku turikuranzya enyima kureeba oku twabaire turi, ekyo Kitambo tikiine eki kiraatugasire. Oo, kanisa 'mwe, timurikukireeba? [Abateeraine baagira bat, "Amiina." -Omur.] Ti nka . . . Tinkaagyeyzaho ogwo murimo. Tindikubaasa, kandi naiwe torikubaasa. Tihariho kyetengo ky'okugyezaho. Obuzire, eky'okubanza kya byona, kasita oranzya ebyo ebi waakozire. Kwonka reka kuranzya ebyo ebi waakozire.

Reeba ebyo ebi ekyo kiro ahari Gologosa kyakukoreire. Kikakushashurira omuhendo. Kikamaraho ekyo kibuzo. "Ebibi byawe n'obu biraabe nibitukura nka karari; biryayera nk'orubaare. N'obu biraabe nibitukura tuku-tuku; biryaba nk'ebyoya by'entama ebirikwera." N'ahabw'ekyo toine kibi. Nooyeria tiitiiti. N'obu waakuba waakozire ki, nari ebi orikukora, nabwo toine kibi. Ku oraabe waayakiriire Yesu Kristo nk'Omujuni waawe, ebibi byawe bisaasiirwe. Ekintu kyona ekisaasiirwe nikiba "kihirweho kandi kyebirwe."

Reero nikikora ki? Nikikuha, ahanyima y'egyo mbeera, Omwoyo We, Okumukuratira kandi n'okukora nk'oku Yaakozire, ahabw'abandi abakuratiireho.

38 Akaba ari Omuntu omwe, Omuntu ohikiriire. Akahayo Amagara Ge, kandi Yaaba eky'okureeberaho kyawe. Hati nituteekwa kukora ki?

Hati, ekintu ky'okubanza eki ndikwenda kugamba, ni, Yesu tarabaireho Ahabwe wenka. Amagara Ge akagakozesa kuyamba abandi. Ago, buzima, nigo Magara Agatahwaho. Ku orikugira ngu oza aha kanisa, kandi ngu okora ebintu birungi, ekyo ni kirungi. Kwonka ku orikutuura amagara gaawe ahabwawe wenka, toine Magara Agatahwaho. Amagara Agatahwaho, n'okubaho ahabw'abandi. Akakihamyu obu Yaija ari Omwana gw'Entama wa Ruhanga. Akabaho, kandi akaba aine Amagara Agatahwaho, ahabw'okuba Tarabaireho Ahabwe wenka. Akabaho ahabw'abandi. Kandi nootunga Amagara Agatahwaho, ahabw'okwakiira ekyo kiro, kandi tookagaruka kubaho ahabwawe wenka bundi. Noobaho ahabw'abandi.

39 Omuntu omwe akagira ati, "Noobaasa ota kwemerera, okareka omuntu weena akakweta amaziina mabi nk'ago?" Torikubaho ahabwawe wenka. Noobaho ahabw'abandi, kugira ngu obundi okaabaasa kucungura ogwo muntu. Nimuba abaana. Kandi omurabanamu gw'ekyo ni ngu, ekanisa eyebirwe ngu bakaba bari abaana. Ori omwana. Nooza omu mwanya gwa Kristo. Ori omwana, n'ahabw'ekyo reka kubaho ahabwawe wenka. Baho ahabw'abandi.

"Kare, Ow'eishe-emwe Branham, nimbaasa kubaho ahabw'ow'eishe-emwe ogu, ahabw'okuba n'omuntu murungi buzima." Tikyo ekyo.

Baho ahabw'omuntu ogwo orikukwanga. Baho ahabw'omuntu ogwo owaakubaasa kukwita ku yaakubona omwanya. Ekyo nikyo Baamukoreire. Bakamwita, kandi Yaafa, kugira ngu Abaase kubajuna. Ago nigo Magara Agatahwaho. Nitutunga . . . gari omunda yaawe, obwo oyorekyereire Eiguru. Kwonka noohayo ebintu byawe, obihayo, nk'entama oku ehayo ebyoya byayo. Amaisho ogahanga Gologosa.

40 Nyine amatsiko ngu eki nikikhwera kugira ahi waahika. Ekyo nikyo tabirinaakuru egi, ekyo nikyo abantu boona, barikuteekwa kukora, n'okumanya eki ori, kandi n'ekigyendererwa. Ekanisa, t'okuza aha kanisa kuteera piyano kwonka, kweshongoro ebyeshongoro kwonka. Ekanisa n'omwanya gw'okugororerwamu. "Orubanja nirutandikira aha b'omu nju ya Ruhanga."

"Nituteekwa kwebara ku tufiire, kwonka ku turi abahuriire ahari Kristo." Kandi, Akataho omuhanda kugira ngu tubaase kwehayo aha murimo Gwe, Okumukuratira. Ku Turaamukuratire, nitutuura amagara agu Yaatwire. Ekyo ni kirungi munonga.

41 Yesu akagamba, kandi yaakigambaho. Ka mbahe okujuriza kukye ahari ekyo. Muhurikize mutaireho omutima. Mutakifeerwa. Yesu akagira ngu, aha Kiro ekyo Aryashoroora abantu, nk'entama n'embuzi. Kandi Aryagambira embuzi ati, "Mwemerere aha rubaju rwa bumosho." Kandi agambire entama ati, "Mwemerere aha rubaju rwa buryo."

Reero Yaagambira embuzi ati, "Mundugyeho. Ahabw'okuba, Nkaba nyine enjara, Timwampa by'okurya. Nkaba ndi omu kihome, timwaija Kundeeba. Nkaba njwaire busha, Timwanjweka. Nkaba nyine eiriho, Timwampa ky'okunywa. Nkaba ndwaire, Timwaija Kundeeba. N'ahabw'ekyo, Mundugyeho."

Kandi aha ntaama, Akagira ati, "Nkaba nyine enjara, Mwampa eby'okurya. Nkaba njwaire busha, Mwanjweka. Nkaba ndwaire, mwaija Mwampeereza."

Kandi mwetegyereze. Mutafeerwa kumanya eki, kanisa 'mwe. Eki mukibiikye omu mitima yaanyu, ebiro byona. Bakabikora batarikukimanya buzima! Abantu tibarikukora ebyo nk'obujunaanizibwa bwabo. Omuntu orikukuha ekintu, ahabw'okuba ashemereire kukikora, omuntu orikukugaburira ahabw'okuba ashemereire kukikora, aine ekiteekateeko ky'okwekunda. Kishemereire kuba amagara gaawe gonyini, ekikorwa kyaweyonyini.

42 Kikatangaaza munonga entama ezi, okuhitsya obu zaabuurize ziti, "Mukama, ni ryari obu Waabaire oine enjara? Haza Tutakuhe by'okurya . . . Ni ryari obu Waabaire oine enjara, Tukakuha eby'okurya? Ni ryari obu Waabaire ojwaire busha, Tukakuhe? Ni ryari obu Waabaire oine eiriho, Tukakuha eky'okunywa? Ni ryari obu Waabaire orwaire, Tukakuheereza?"

Bakabikora ahabwa rukundo batabandize baabiteekateekaho buzima, n'Amagara Gaawe agu baabaire batwire. Ai Ruhanga, abantu ka bareebe eki Gologosa yaatukoreire, kukorwa kitabandize kyateekateekwaho buzima.

“Ni ryari obu Waabaire, Mukama? Ekyo titurakimanyire.”

Reeba ekyo. Yesu akahinduka yaagira ati, “Nk’oku mwabikoreire aba, biri Niinye mwabikoreire.”

Amagara agatari g’obugumya, ti kiteekateeko kya kabiri. Ti kukiteekateekaho; kureka ofeereire kimwe aha bintu by’ensi egi, kandi ohuriire buzima omuri Kristo, kandi noogyenda ohamire buzima omu muhanda rugyendwa, okuhitsya obu ebintu ebi biri ekintu eki orikushanga waakozire. Noobikora kwonka.

43 Kutari kugira oti, “Mbweni, hati, Mukama? Mukama, ekyo nooyenda ngu nkikore?” Tikyo ekyo. Ori orugingo Rue. Omwoyo We ari omuriyiwe, n’ahabw’ekyo nootwaza nk’oku Yaatwaize. Oo! Kyetegyereze.

“Hariho omuhanda ogu omuntu ayeta murungi, kwonka omuheru gwagwo guri omuhanda gw’okufa.”

“Boona abarikugira bati, ‘Mukama, Mukama,’ tibo abaritaahamu, kureka abo abarikukora ebi Tata akunda,” okuruga omu mitima yaabo buzima, n’obufura.

Hati, ekyo kiro ahari Gologosa kikashashura ogwo muhendo, kugira ngu tubaase kuba tutyo.

Ti kugira oti, “Noomanya, omufakazi Jones rimwe akaba . . . Amakara gakaba gamuhweireho, ntyo naagyenda naamugurira amakara. Ka nkugambire, nkareeba ow’eishe-emwe owaabaire akyenire eshuuti, naagyenda naamugurira eshuuti. Ruhanga asiimwe! Ndi Omukristaayo.” Ai bambe, mugyenzi! Iwe muntu ‘we orikwekunda, omworo, enshoberwa. Ori endyarya.

“Omukono gwawe gwa buryo gurekye kumanya eki ogwa bumosho gurikukora, n’ogwa bumosho kumanya eki ogwa buryo gurikukora.” Ofeereire kimwe omuri Kristo, okuhitsya obu orikukikora, oku biri kwona. N’obuhangwa bwawe. Nikwo okozirwe. Nookikora, oku biri kwona. N’ago Magara agahuriire omuriyiwe. Oyeheereireyo kimwe ahari ogwo Mwoyo, kandi We wenka Naatuura omuriyiwe.

44 Oo, nooyehuriram ogwo Mwoyo ohairwe omugisha, ago Magara! “Tinkiri nyowe ori,” Paulo nikwo yaagizire, “kureka Kristo niwe ari omuriyiwe,” nikyekora kyonka.

“Mbweni, ka kugambire, Ow’eishe-emwe Branham, turi Abakristaayo hanu. Nituhwera abantu aba. Abantu abo nitubahwera.” Oo, mugyenzi! Waashwara. Obwo ti Bukristaayo.

Obukristaayo nikiteekwa kukorwa kitateekateekirweho. N’eky’okukorwa. Kandi ebyo noobyebwa, ebyo byona ebya, “Tindikwenda.” Gyenda, okikore.

Kristo akaheerayo kimwe Amagara Ge ahari Ruhanga. Akeehayo, nk’omuheereza wa boona, w’abantu. Akahayo Amagara Ge, ayekundiire. Kikaba Kitarikumwetaagisa kukikora. Tarakikozire naayetomboita. Taragizire ati, “Hati, b’eishe-emwe, mwena mushemereire Kunteekateekaho munonga, ahabw’okuba Nyizire kubafeera.” Taragambire kigambo na kimwe ahari ekyo. Akafa, atyo, ahabw’okuba akaba ari Ruhanga Omuriyiwe.

Ni Ruhanga omuriyiwe, ni Ruhanga omuriyiwe, orikutuma twareeba abandi.

45 Entaama, aha rubaju rumwe.

Omwe omuribo aryagira ati, “Mpaho, Mukama, nkakora eki. Kandi, Mukama, nkakora na kiri.”

Akagira ati, “Mundugye omu maisho, imwe abakora eby’obugomi. N’okubamanya Tinkabamanya.”

Kuri ekanisa neebaasa kuhika aha kumanya ago mazima agahamire, ngu ti kintu eki orikugyezaho kukora, eki orikwegyema kukora. N’ekintu ekirikuzaarwa omuriyiwe.

46 Munsasire, banywani bangye Abapentekoote. Ndi Omupentekoote. Kwonka banywani bangye Abapentekoote bahikire aha mwanya, ahu kirikuteekwa kuba okweshongora jubajuba mu-munonga, okuteera zaabanda, nari kuteera omu ngaro, nari ebitaasa, kugira ngu habeho akaari. Okwo n’okucamukirira kwonka. Beeshongora na zaabanda batakagiire omu rugamba. Bataasya abantu omu kucamukirira kw’orugamba. Niinyikiririza omu kweshongora. Niinyikiririza omu kuteera omu ngaro. Kwonka niinyikiririza omu bintu ebi. Buzima ekyo n’amazima. Ebyo tushemereire kubigira.

Kwonka mutsigireho ebintu bikuru bitakozirwe, n’ago magara g’okwehayo agu Ruhanga arikutuura omuriyiwe, okeeshanga nookora ekyo ekihikire ahabw’okuba kihikire. Noogumizamu kwonka, otakiteekateekireho nangwa n’ekintu kyona. Okukituura kwonka. Reero oranzye, orebee ekirikugyenda omu maisho. Noofa . . . tori . . . Ori omu muhanda rugyendwa. Ekyo nikyo Gologosa yaakukoreire, omu muhanda rugyendwa, ogwakwiguriirweho ekyo kiro.

47 Hati, hati ijuka, torikubaasa kuba embuzi ekicweka n’entaama ekicweka. Tibikaajwangana.

Hati, hariho abantu baingi abarikugira ngu, “Eego, noomanya ki? Twine entebeekanisa omu kibiina kyaitu. Itwe, nituhwera abooro. Nitukora eki.” Ekyo ni kirungi, kwonka oriyo nooyeteerera enzamba. Ekyo otakikora.

“Okugaba kwawe kube omu mubonano,” Yesu nikwo yaagizire. Ahariyiwe n’ekintu, eki orikushanga waakozire,

nk'okugyenda, okaihayo amaizi g'okunywa. Oine eiriho. Omuntu okuri haihi ku araabe aine eiriho, noomuteekateekaho, nawe. Ekyetengo ky'omuntu okuri haihi, noomuteekateekaho nk'oku waakuteekateekire aha yetengo kyawe. Kandi otaakitaho omutima na kakye. Kutuura ori otyo kwonka.

48 Hati, torikubaasa kuba entaama ekicweka n'embuzi ekicweka.

N'ahabw'ekyo ku oraagire oti, "Mbweni, ekanisa yaitu eine entebeekanisa. Nituhwera abooro, tukora eki, tukora kiri, kandi tukora na kiriya."

Ku oraabe oine ekyo hatariho ekindi kiriya, Amagara ga Kristo omuriyiwe, buzima oriyo nookikorera busha. Yesu . . . Paulo akagira, Abakorinso y'Okubanza 13 ati, "N'obu naakugaba ebintu byangye byona kuriisa abooro, kandi nkahayo omubiri gwangye kwokibwa nk'ekitambo, tikiine ki kyakungasira."

Hati, eki kigumire, kwonka n'Amazima. Nooteekwa kuhika ahari ago mazima, omanyé eki Gologosa yaakukoreire.

49 Nitukireeba, tugira tuti, "Oo, eego, ekyo ni kirungi." Tikyo ekyo. Ku kiraabe kyayetaagiise ogwo Mwana wa Ruhanga kuza Gologosa, kubambwa, buri mwana orikwija naateekwa kuza Gologosa. Nawe naateekwa kugira Gologosa. Nooteekwa kugira ekyo kiro kya Gologosa. Ninteeekwa kugira ekyo kiro kya Gologosa. Ekyo nikimarahó ekibuuozo ky'ekibi. Kutari okukwatana omu ngaro n'omubuurizi; kutari okuheebwa omukono okareetwa omu kanisa; kutari okutaahamu ahabw'ebaruha; kutari okutaahamu ahabw'okwatura. Kureka okutaahamu ahabw'Okuzaarwa. Tarahaire baruha. Tarahaire okwatura. Akaha Okuzaarwa. Okwo nikwo turikutaahamu. Reero, kuruga aho, nitweshanga tutwire amagara g'Omukristaayo.

50 Hati, ekindi kigambo. Embuzi ekicweka, entaama ekicweka, tibaine ekintu nk'ekyo. Tori mbuzi ekicweka n'entaama ekicweka. Ori embuzi nari entaama.

Hati, ku oraabe nookora ebintu birungi kwonka, haza okateekateeka ngu noobaasa kutaahamu, ahabw'ebyo, kyaba kiri kityo tihaakubaireho ekiro kya Gologosa. Ebiragiro bikaba biine ebyo. Kwonka, ahabw'okuba ngu kikeetaagisa ekiro kya Gologosa, kikaba kiri eky'okutaasyamu ekyo, kugira ngu tutaba baamemba b'ekanisa kwonka, kureka tube batabani na bahara ba Ruhanga. Ekyo nikyo ekiro kya Gologosa kyabaire kiri. Ekyo nikyo kyabaire nikimanyisa ahariiwe, kugira ngu obaase kukora, okuratire, kandi otwaze nka Yesu.

Hati, omugyera tigutemba kandi gukashuumma, omu bwire bumwe. Omugyera gugyenda nigutoora orubaju rumwe rwonka. Kandi n'Omwoyo wa Ruhanga atoora orubaju rumwe rwonka. Taayejwanzyamu bintu. Atoora orubaju orwo.

51 Reeba Yesu, omu kuhendera. Yesu akagira ati, "Emirimo Ei nkora naimwe muryagikora, kandi muryakora erikukira egi obuhango, ahabw'okuba Ningyenda ahari Tata."

Eki tindikukigamba ahabw'egi kanisa hanu. Nimwetegyereza. Kwonka Obutumwa obu nibukwatwa aha ntambi z'amaraka. Emitwaro n'emitwaro nibazihurira, omu nsi yoona.

Naaza kugarukamu ekyo kibuuzo ky'omuhakani, hati hati. Kaingi ntwire . . . bagira ngu ngambire. Babuuza bati, "Ahabw'enki, noikiriza Baiburi? Yesu akagira ati, 'Emirimo egi ei Nkora naimwe muryagikora, kandi muryakora erikukira egi obuhango, ahabw'okuba Ningyenda ahari Tata."

52 Noobaasa kuba mubi ota, sebo? Noobaasa ota kuzengyerera okaza hare n'okukyenga, n'obwengye bwawe bw'eb'yotendekirwe omu by'ediini, n'okukyenga ekintu kyona omu bwengye bw'obuntu? Munywani wangye omurungi kandi obuzire, torikubaasa kwetegyereza ku Baiburi egi erikushoboororwa omu buryo bw'omwoyo?

Yesu akasiima Ishe ngu Akagishereka abeegire, abarabukire munonga, abanyabwengye, n'abarikwetegyereza, kandi Agishuuruurira abeereere abo abaija Gologosa.

53 Hati reeba. Yesu akagamba. Reeba oku Yaakigambire. "Emirimo ei Nkora," Naagikora hati hati. "Emirimo ei Ndikukora hati, kutambira abarwaire, kuzoora abafu, kuhumuura empumi, emirimo egi naimwe muryagikora. Muryakora egi ku muraabe Nimuunyikiririzamu. Emirimo egi nimugikora. Reero kandi muryakora erikukira egi obuhango, ahabw'okuba Ningyenda ahari Tata."

"Hatsigaire omwanya mukye, ensi Okutandeeba bundi, kwonka imwe Muryandeeba. Ndyaguma naimwe, nangwa n'omuriimwe, okuhitsya obu ensi egi erihwaho. Tindibatsiga muri efuuzi. Ndyashaba Tata; Aboohereze Omuhwezi ondijio, niwe Omwoyo Orikwera, ou ensi etarikubaasa kwakiira; kwonka, imwe nimubaasa Kumwakiira."

54 Hati yetegyereze. Emirimo egoy "erikukira obuhango", ekaba eri okutunga Amaani omu Kanisa, kutari okutambira abarwaire kwonka kurabira omu kushaba, kubinga baadaimoni kurabira omu kushaba, kureka okuha abaikiriza Amagara Agatahwaho. Omwoyo Orikwera akaba naija, kandi yaateebwa omu ngaro z'Ekanisa, kuha Amagara. Oo! Ago nigo makuru ga Gologosa. Ekakwata abashaija n'abakazi abeinamiriire, abarikugaywa, yaabaimutsya yaabata omu mwanya, kuba batabani na bahara ba Ruhanga, kutambira abarwaire n'okuha

Amagara Agatahwaho; ababw'okuha Omwoyo Orikwera abaikiriza abahurizi, abantu abaabaire rimwe bari abatarikwikiriza, bahindurwe abaikiriza, kandi bahe, omwoyo, Amagara Agatahwaho.

55 Ka ni kikuru munonga okukiraho, kugamba . . .

Ogu mukazi orwaire orambiire hanu, nimbaasa kushaba okushaba okurimu okwikiriza akire.

Ekyo n'ekintu kikuru. Ekyo nikyo Yaabaire naakora obwire obwo.

"Kwonka," akagira ati, "muryakora erikukira egi obuhango. Naaza kubaha Amaani, gatari ag'okumwimutsya akaire kakye, kureka kumuha Amagara Agatahwaho, agarikwija kuba Agatahwaho, ebiro byona." Abantu abooro, empumi, enshoberwa, ekyo nikibarabaho kita? Timurikureeba "ekirikukira obuhango" eki kiri? Ekyo n'ekintu ekirikukirirayo kimwe obuhango ekyakubaasize kubaho, kikaba kiri okuha abantu Amagara Agatahwaho.

56 Amagara Agatahwaho niki? Amagara agu Yaatwire, Amagara agaabaire gari Omuriwe, Ago gahe abandi. Omuntu ekyo naabaasa kukikora? Omwana wa Ruhanga naabaasa.

Yesu akagira ati, "Boona abu murisaasira ebibi, baryabisaasirwa; kandi abu murigumyaho ebibi, biryabagumaho."

Hati hanu niho ekanisa Enkatorika n'agandi maingi gaakoreire enshobe yaago mpango. Nibagyenda bagira ngu, "Naakusaasira ebibi byawe." Kikaba kitari ekyo.

Bakasaasirwa bata ebibi, omuri Baiburi? Petero akagarukamu ekyo kibuuzo, aha Izooba rya Pentekoote. Bakabuuza bati, "Tukore ki kugira ngu tujunwe? Nitubaasa tutu kutunga eki eki mwena mwine?" Akaha endagiiriro. Akabagambira eky'okukora.

Akagira ati, "Mweteise, mwena, ahari Ruhanga, mubatizibwe omu Iziina rya Yesu Kristo." Ahabw'enki? Okusaasirwa ebibi byanyu. Egyo niyo mirimo "erikukira obuhango".

57 Ni bangahi, babuurizi 'mwe akasheeshe aka, ni bangahi, imwe abahurikiize Ekigambo kyangye aha rutambi rw'amaraka, abaikiriize kuza Gologosa akasheeshe aka? Reero mureebe eki Ruhanga yaakozireyo ahabwanyu. Kandi mutsigyeho enyikiriza z'ebigombe by'amadiini gaanyu, mubuurire Engiri. Haleluya! Kiri omu ngaro zanyu hati. Mwaza Kukikorera ki?

"Ahakuba okweteisa n'okwiwhaho ebibi nibiteekwa kubuuriwa omu Iziina Rye, omu nsi yoona, okutandikira Yerusaalemu." Haleluya! Ekitiinisa! Nikyo ekyo.

Gologosa neemanyisa ki ahariiwe? Ekyo kiro kikakukorera ki? Kikakwijuriza kimwe, n'enyegyesa z'ediini? Kikakuhindura omunyamaryo? Nari kikakuhindura Omukristaayo, oyeheereireyo kimwe? Haleluya!

Ekibi, kisaasiirwe! "Muryakora emirimo erikukira egi obuhango." Nimureeba abu ba "imwe" bari, tikwo? "Emirimo erikukira egi obuhango," okusaasira ebibi, omu Iziina rya Yesu Kristo.

Kwonka okurabira omu nyikiriza z'ediini hamwe n'ebigombe by'amadiini, n'ebindi nk'ebyo, bibabohire byabahitsya ahi, mukiryo nimuheereza ensi.

58 Ngambira omushaija weena, ngambira omukazi weena, orikubaasa kwija Gologosa haza akagyezaho kuba omuntu w'amaani ahabw'okuba omuntu ondi haine eki agambire. Ngambira ahu orikubaasa kureeba Gologosa omu kaso, omu mushana gwayo oguhikire, ekyo kiro omuri Gologosa. Noobaasa ota kugira ekiro kyaweh ahari Gologosa, haza okarugayo ori omuntu w'amarayo? Noobaasa ota kurugayo ori ekikozeso ky'ekibiina ky'ediini, okabuuriira enyegyesa ezigunzirwe abantu? Ahabw'enki kitarikukuhindura omucureezi aha Kigambo kya Ruhanga? Ku waakuzayo, noorugayo ori omucureezi. Noobaasa ota kwenda kuba omuntu w'amaani omu kibiina kyaweh ky'ediini, oine omwemanyo, kunu Yesu Kristo Omwana wa Ruhanga Yaayecureize akahika aha kutemwatemwa omubiri, akacwerwa amacwante omu maisho, okuhitsya obu yaayemeire enshoni n'okushekyererwa? Kandi Bakamujuura ebijwaro Bye, Baamubamba, omu maisho g'ensi. "Akagaya enshoni." Noobaasa ota kuza Gologosa haza okarugayo ori okundi okutari nk'oku Yaabaire ari, okwemera enshoni, n'okushekyererwa?

"Ai bambe," noogira oti, "nibaza kumbinga." Barekye bakubingye.

Tunga ekiro kyaweh ahari Gologosa, Ruhanga naija kumanya eky'okukukorera. Ekyo ka nkigarukyemu. Tunga ekiro kyaweh ahari Gologosa, Ruhanga naija kumanya eky'okukkorera.

Ka tushabe.

59 Mukama, Ai Ruhanga, tutware twena otuhitsye Gologosa hati hati. Ka turugye omu kwyeyendeza, Mukama, okutiina abantu, okutiina eki ondijo muntu arikuza kugamba. Ahabw'enki, ensi yoona Ekamushekyererwa, Yaamushungisa. Kwonka Akooroba, kuhitsya aha kufa. Akooroba, kuhitsya aha kuhemuka. Akooroba, nangwa yaayorobera n'obutegyeki bukur.

Kandi nitwetegyereza ngu Sitaane ku yaateire egi nsi, akahinduka omutegyeki kandi ow'obushoboorozi omu nsi egi. Ekyo akakihamya omu maisho ga Mukama waitu, yaagira ati, "Obugabe obu n'obwangye. Nimbukozesa eki ndikwenda kyona." Kandi nitwetegyereza ngu, okuruga aha kiro ekyo okuhitsya hati, ensi egi, ahansi y'omukyeeeno, etwire neetegyekwa n'ogwo owaagikyeenire.

Kwonka, Ruhanga, Ai Ruhanga, nituheereza Obugabe obutakyeenirwe.

Taata, Ruhanga, ka n'eky'okutangaaza, okureeba ngu Okozire ebantu bikuru omu-omu nsi ya filimu ebi. Oikiriize ebishushani bikuru ebi, nk' Ebiragi Ikumi, n'ebindi, kukorwa, kugira ngu abashaija n'abakazi bareebe, abataakubaasize nangwa n'okutaaha omu muryango gw'ekanisa, kwonka obaikiriize kureeba eki kiri. Omuhanda gwa Ruhanga n'omuhanda ogurikwangwa, n'ab'ensi. Ahabw'okuba turi nka . . . Nituza omuri Russia erikutegyekwa komyunizimu.

Turi omuri egi nsi, kwonka tituri b'ensi egi. Tugiire Gologosa. Twebambire, ahabw'Obukama bwa Ruhanga, kuba bamwe ahari Abe. N'obu ensi yaakugamba ki, nitutoora omuhanda gw'abakye ba Mukama abarikugaywa. Nitugumizamu kuhika aha kuzooka, kandi nitwikiriza ngu ekyo kiriire haihi munonga, Mukama, okuhitsya obu turizookyerwa omu Bukama oburitegyeka egi nsi. Nk'oku Danieli yaakireebire kitakabaireho, akasheenyagura ensi yoona, yaaghindura obusaasingo, reero omuyaga gw'ekyanda ogweyerera embuga gwabuhuuha. Kwonka, orwo rushozi, Eibaare eryo rikakura ryaba orushozi ruhango orwabugire ensi. Eibaare eryo riryaija. Ai Ruhanga, nitwenda kuba ekicweka kyaryo. Ka tweyangise, twekorere omusharaba gwaitu obutoosha, tubebo ahabwa Kristo, tubebo ahabw'abandi. Kituhe, Mukama.

60 Ku haraabe hariho abantu bamwe hanu akasheeshe aka, Abatarikumumanya nk'Omujuni, kwonka abarikwenda kwijukwa omu shaara y'okuhendera, kandi abakaayenzire eri kuba eizooba ryabo ahari Gologosa, mwereeeze emikono yaanyu, mugire muti, "Nshabira, Ow'eishe-emwe Branham. Niinyenda Kumumanya nk'Omujuni wangye." Ruhanga akuhe omugisha, mutsigazi. Ondijo muntu? Ruhanga akuhe omugisha, ow'eishe-emwe mugyenzi wangye enyima aho.

Hakaaba hariho ondijo muntu? Gira oti, "Niinyenda Kumumanya. Niinyenda eki kibe ekiro kyangye, ahari Gologosa. Ntamirwe kandi nduhire. Kinyiniire mugasho ki kuzaanazaanira hanu n'ekintu ekyo kyonyini eki naazaariirwe kukora? Nkazaarwa, nkazaarwa kuba omwana wa Ruhanga, kwonka ndi aha ndamatire aha bintu by'ensi. Ai Ruhanga, ka mbambwe eriizooba. Eriizooba, ka nyebambe, n'ebiteekateeko byangye, mbone kuba ohuriire na Kristo, kandi mbeho ahabw'abandi. N'obu baakunkorera ki, ku baranshungise, bakampiiga, kandi bakangambaho ebibi byona, n'ebindi, nyikiriza ngume ningyenda n'obucureezi, nyebundaarize, nk'omwana gw'entama, nk'oku Yaakozire. Kandi ekiro kimwe, Akaraganisa kunzoora, aha Kiro ky'aha mperu. Ntegyereize ekyo Kiro." Hakaaba hariho abandi abarikwenda kwereeza emikono? Ruhanga akuhe omugisha enyima aho, hamwe naiwe. Kare. Abandi . . . Ruhangaakuhe omugisha. Ruhangaakuhe omugisha. Abandi, tutakashabire.

61 Tataitwe ow'omu Iguru, kikagambwa, obu Petero abuurira aha Izooba rya Pentekoote ngu, "Boona abaikiriize bakongyerwa aha Kanisa." Buzima bakaikiriza n'emitima yaabo yoona. Abantu aba abaayereeza emikono yaabo, niinyikiriza ngu baikiriza n'emitima yaabo yoona. Kandi ku baraabe baikiriza, hariho ekiyanja ky'amaizi ekitegyereize hanu. Nibenda ngu ebibi ebyo bisaasirwe. Hanu hariho orikubaasa kubabatiza omu Iziina eryo, kandi niryo Eiziina ryonka eriraho ahansi y'Eiguru eryahairwe abantu, erishemereire kutujuna.

Ahakuba, nk'oku naaheza kujuriza Ekyahandiikirwe akaanya kakye akaahingura, ngu, "Okweteisa n'okwiwhaho ebibi nibiteekwa kubuirirwa omu Iziina Rye, omu nsi yoona, okutandikira Yerusaalemu." Kandi omuri Yerusaalemu, okweteisa n'okwiwhaho ebibi ku byabuuriirwe, egoy ntumwa ekabagambira Ebyahandiikirwe, yaagira eti, "Nibateekwa kweteisa, okubanza, reero babatizibwe omu Iziina rya Yesu Kristo." Ogwo gukaba guri omurimo gw'omubuurizi. Ngu bo beeteise, nawe ababatize ahabw'okwiwhaho ebibi byabo. "Boona abu murisaasira ebibi, baryabisaaasirwa; abu murigumyaho ebibi, biryabagumaho."

62 Taata, ab'ensi bakarahuka bata kugira ekiniga nk'eki baine? Ahabw'enki batarikwikiriza Engiri eyanguhi? Kandi nangwa nibataasyamu, ahabw'ekyo, okuhaanisa: amaziina g'ebishuba, okubatiza kw'ebishuba, okubatizibwa kw'Omwoyo Orikwera kw'ebishuba, okukwatana omu ngaro n'abaheereza, nibakoresa ebitiinisa bya Isheboona, Omwana, Omwoyo Orikwera, ekitakabahoga omu Byahandiikirwe; ekihandiiko ekyagunzirwe Abarooma, etari nyegyesa y'Abakristaayo ahantu hoona omuri Baiburi. Okwiwhaho ebibi tibirikubaasa kwihwaho omu bitiinisa, kureka omu Iziina rya Yesu Kristo.

Hati, Taata, nitumanya ngu baangi tibarikukikunda. Emihanda Yaawe nikwo etwire obutoosha. Kwonka ikiriza abashaija n'abakazi, akasheeshe aka, bahikye ahari ekyo kiro, ekyo kiro ahari Gologosa. Ahu, Yesu, naagaya ekiro ekyo, ekyo kihemu, okujuurwa ebijwaro, okutemwatemwa obucwekacweka, okucwerwa amacwante, n'okushungwa; n'ensi yoona, n'ekanisa, n'abantu abaakubaire bashemereire Kumukunda. Kandi, nabwo, omuri ebyo byona, Taraashamize kanwa Ke, kureka akagumizamu yaafeera abantu abo abaabaire Nibamushungisa.

63 Ai Ruhanga, tutware Gologosa, akasheeshe aka. Kandi ku baraagire ngu tugwire eiraro, bakagira ngu titurikwetegyereza Ebyahandiikirwe, eki baraayende kugamba kyona, Ai Ruhanga, tibarikubaasa kwemerera omu Maisho ga Ruhanga haza bakagira ngu Kigwire. Tibarikubaasa kushweka ebibi byabo na Baiburi. Baiburi neeshwekuura ebibi byabo, obutaikiriza bwabo; kwenda kukundwa baangi, kukora nk'abandi bantu. Baikirize baije

Gologosa, akasheeshe aka.

“Kandi okutandikira Yerusaalemu, ngu okweteisa n'okwiwhaho ebibi nikuteekwa kubuurirwa omu Iziina Rye, omu mahanga goona, okutandikira Yerusaalemu.” Ka batware egyo ntambo niyo emwe y'okubambwa, y'okutemwatemwa, n'okucwerwa amacwante, n'okushungwa, kandi n'okwetwa buri kintu eki barikubaasa kwetwa, omu buryo bw'okwetwa endeme y'ediini, erikusheenya amakanisa. Kyona eki barikwenda kutweta, ninshaba ngu, Mukama, akasheeshe aka, tutoore omuhanda gwaitu gw'abakye ba Mukama abarikugaywa. Ninshaba ngu tugyende nk'entumwa oku zaagyenzire, tutarikutoora orubaju rwa buryo nari orwa bumoshio. Kandi, okuruga omu burungi bw'omu mitima yaitu, tuheereze Ruhanga. Kitukorere, Taata.

Hati kiza abarwaire n'abarikubonabona abarikwija omu runyiriri rw'ab'okushabirwa. Ninshaba ngu aba abaayereeza emikono yaabo, omu mitima yaabo, beeteise hati hati. Ninshaba ngu aba abaayemerera enyima, omwanya muraingwa, baze omu maizi jubajuba, babone kusaasirwa ebibi byabo omu Iziina ry'ekyo Kitambo, Yesu Kristo, Omwana wa Ruhanga. Amiina.



[www.messagehub.info](http://www.messagehub.info)

Obutumwa obu bukabuurirwa  
**William Marrion Branham**  
“... omu biro by'eiraka ...” Kush 10:7